





R55
908









Vorred zum leser mit anzeige
was das buechlein innhalt.

Sey gegrüßt mein allerliebster leser vernym disß buechlein
Schnaphan genandt / welchs du auch nit mit gerüngleter
stirn / als ob es ein schmech buech wer / wöllest annemem / sun
der frölichs angesichts / als einen spigel / darinnen du ersehen
magst vnd erlernen / das seliglich leben der Neien gehäret
gestrengen vorfehtern / außbreitern vnd haubtleiten / alls
sy sich nennen des Ewangeli Christi. was auch ir seliger fur
satz vnd gemüet sey / vnd merck eben das in disem buechlein /
Zum ersten auf dem veld / vngenerlich zum Creutzgang zu
samen kumen / vnd von den Turckischen handlungen / des
verdampften Namalückischen Franzen von Sickingen vñ
seines teüflischen verpuebten vnterschembten aller bößheit
anhangth / vnd errethen zwen des selben seiten / hochberümb
ter haubtmenner / Nemlich Schnaphan / von dē disß buech
lein seinen namen hat / derselbig tregt dy person der armē häy
losen verdorben Reüter / dy sich allain in Stegrais / als mā
spricht vñ mit Raißdienern erneren Fursten vñ herrn damit
sy allain Erzbüben sein mögen / scheüchen zediene / Vñ dan
Puzer ein hochgelerter verbüebter neier Ewangelist / der
etwe ein schacksmünich / dy mā dy Augustiner nennt gewest /
der tregt dy person der Geisliche / die auß den orden lauffen
Neien glauben / vnd das man kein glübnuß sol halten offen
lich lernen / damit sy der welt lust / vñ zuuor des Reibeyßens
das di Kochin vnder dem fürttiech tregt an straff auch mögē
genyessen / Dise zwen khern ein von wegen der zufallennden
macht (als sy nün etwas vil von Franzen geredt haben) zu
eins vast Ewangelischen Ritters hauffs der Steyninger ge

85-16.72.

R 55/908



nandt/der selbig Steyninger/tregt dy person der Edln die
hämlich volck geschickt haben/vñ sich es doch mit annemē
doiffen/das sy Franzen günstig/dann sy haben laider zuwil
vñnd sitzen zewol im land/derselbig Steyninger hat einen
knecht/der auch in disem buechlein zūzeitē ein vntterred thut
Vnd in des Steyningers hauss seien noch zwen ander Edl
leit einer genant der Berner/der tregt dy person der vnschul
digen Edln/dy sich allain durch verführung/sich zū Franze
verpunden haben/möchten leyden sy wern wider mit süeg
aus solhm pünde/Der ander Eysenclat/der tregt dy person
der Edln/den mit vil an keinem vnglück gelegen/sunder ver/
hoffen sich alles irs vermuetwillens schadens an den Kaufleu
ten.wañ man gen Franckfurt in dy meß zeucht/wider züer/
holen/Vnd hinder den sitzt ein arms tröpflein/der Sigler ge
nandt/der gedencet sein maynung allain im syn / darff aber
vor den andern egemelten Edln mit redē/ der tregt dy person
der armen erschrocken Pfefflein/in disem seltsamen leitffen.

¶ Diser aller maynung wirstu an yeglicher person worten
auch was Erbergkath hinder einem yeglichen/vñnd seins
gleichen sey/wol vernemen/dañ jr leben solicher Neier ewā
gelischen haltung/ist ser heilig/vnd dem Ewangeli gemess/
wañ ee jr einer dz klein gebörlen Jesu Mathei.v.c.du solt nit
schwern bey einem haubt/dañ du kanst desselben ein löcklein
nit weis noch schwarz machen/oberfüere/er schwier ehe bej
gots leichnam/marter/wunden/plüet vnd flaisch/vnd vill
ander güeter handel/das sy vleyssig volbringen/in Rauben
Morden.Premmen vñ treiloff werden/das ich yzt von kurtz
wegen züerzelen wil vnderlassen/es ist laider genüeg am tag
Doch mein lieber leser/verstee auch nit/dz der gering auctor
disz buechlins durch sollich den Pfaffen wol schmaichlen

oder wolgefallen/dann wo sy vorhin nit genug wern außge-
waschen/het er auch etwas von demselben hier inen mögen
furbringē/acht es aber an not sein/gebendt dir disß büchlein
was zeuil oder zewenig darinn selbs zepessern.

Gehab dich woll.

Schnaphan Wo her mendlen wo her. Putzer. Gnad
junckherr/Da her vber das Creutzgaw. Schnap/Sich
poz macht Pfaff bistu es / wo hin außs sannd veltins chür/
wo kumbst du her. Putzer / sich schnap/ich hab dein auch
nit gekandt/ich meint du werest ein Edlman/gest etwan da
herauß spaciern/darum sagt ich gnad junckher/Lieber kan-
testu mich zum ersten nicht. Schnap. Nayn bey gots mey-
den. Putzer/ Lieber wo poser wint ist als mir yzt haben/do
mueß man sich also stelln/ich streich daher vber das Creutz
gaw/bin willens zum Liechtensteren / da weis ich ein guete
tochter dy sitzt an der Babilonischñ gefencknis/dy will ich/
es sey dan kein glück dabey/erlosen/Als ich vormals zu Lo-
hental auch gethan hab. Schnap / Poz wunder/was ha-
ben dy himel hüern an dir ersehen/ das du sy all lösen mueßt/
Poz flaisch wo kumbts du mit den hüern hin. Putzer/Liez-
ber bin ich schon schwarz vn̄ heftlich/so bin ich doch freunt-
lich/ich fuer sy all meinem junckher Franzen haim/der helt
sy durch gots willn/in seinem frawen zimer/ auß dem Ewā-
geli/was ir dem wenigistn außs den meinen thuet/das thut ir
mir selbst. Schnaphan/ Ey got geb dem Ewangeli sand
Stolpriann/du Ewangelist/dein junckher greiffst do nyden
vñ sy/nymbt wo ers fundt/so treibst du hüern zue/dan habt
ir zeschleimen vnd zühelsen/beyeinander/vmb einen gleichen
pfennig/Aber ich vnd mein orden/komen schier/ dyweil wir

Evangelisch sein/an den petlstab/dan vorhin/ehe ich deine
junckhern dienet/Kait ich/yzt muesz ich zefuessen gen. Putz
Wie so. Schnap/ Por krafft was fragst du. Ich hab ge/
meint wer Evangelisch wer/de gieng es/wie er selbs wolt/
er töfft mit sorgē/wie das voglein vñ dy plüemlein auf dez
felt so hats sant veltins khür. Den Pfaltzgraffe/Landgraffin
vnd fladenweiber von Trier/auf gebracht/ Vor denen stee
wir in grossen sorgen/vnnd dy pesten kumen vmb ire heuser
vnd flecken/das dünckt mich mit ewangelisch sein. Putz/es
ist gut/es sol vnd muesz also sein/dan es stet im ewangelio/se
lig sein dy verfolgung leiden/von der gerechtigkeit wegen/
vnd selig seit ir so sy euch thun/vnd vbl nachreden/vnd lie/
gen von euch als vbl/von meinē wegē/dan ewr lon ist groß
im himl. Schnap/ Por leiden/mit dem nachreden vnd lie/
gen/manst du mich yzt daran/das ich sagē muesz/wie negst
ein onmechtig man zū fürfelt im wirtzhaus frantzen vnnd
seinem hauffenden wein ausschier/das in noch got schmeht/
in den pöswicht hinein. Putz/wer war der. Schnap/ ich
waiss nicht aigenntlich. Ich glaub aber er sey ein Pfaff ge/
wesen/aber hat derselben leit beschesser einer wollen werdē/
Putzer/ha/es ist des rechtē korns/er forcht villeicht er würde
meinem junckhern frantzen auch zū täl/vnd muesz im den
seckl speisen/darumb redt er im nichte güts nach. Schnap/
der lecker hieb an spotweiss als wolt er frantzen loben/redt
her/vnd sagte/maint villeicht ich verstuendt es nicht. Ja ist
es nit zū erparmen das/das heilig ewangelium vñ sein vor/
fechter die haubtleit (der gleiche send der apostl zeit so streng
nye gewesen) also pöflich sollen püntter getrücker werdē/Do
fragt in einer lieber freündt wie/Do antwürt er/Lieber wist
ir nit/wie auss vermög/des ewangeli in verschiner zeit/sich

versamlt haben zu Landaw/ain grosse buebenschafft. solt sa-
gen Ritterschafft in gots namen/als dan it verschreibung in
helt/vn̄ auch geschriebē stet/Wo zwen/oder drey versamlt
sein/in meinem namen so bin ich mittn vnder innen/vnd do
gemacht ein bruederliche vereynigung/vnd ein neües recht/
dan̄ sunst kein furst noch recht was/vn̄ denselben zu haubt
man vn̄ volstrecker gemacht/den Christlichn frumen Ewā-
gelischē Franzen von Sickingn/der selb als bald er haubt
man worden ist/vnd denselbign heiligen Landawers bundt
hilff erlanngt/gedacht er dy ihenen/so nicht zu der hochzeit
desselben bundts wolten/darzue zetreiben außs der gleichnüs
des ewangelischn hausaters/der dj armen hinein ließ treibē
das erfüllt würd sein haufs/vnnd noch vorbehaltung viler
Bischoff/äbtt vnnd Stifft/dy auch auf der hochzeit sein
solten/doch in peser an hochzeitlicher Kleidung/dan̄ er hofft
sy auch Christlich zu reformirn/oder in dy äusserestn finstern
nüß zuüerjagen/Allain den Mentzischen Breuthüeter oder
badknecht/in seinem badhemad/aufgeschiedn/dan̄ er was
willeicht Franzen bekant/hueb er/der/des erstn an/noch
vbl solt ich sagen/wol verwarter/Er mit einer Erbern rot/
dy David viros sangwineos nennt,das seind dy Ewangelis-
schen vorfechter/yzt zu d zeit/wiewol vorzeiten warms krigs
leüt/hürnwirt.Mörder. Lebrecher vnd dergleichen. Aber
dy Gramatigk̄h ist yzt spützig worden/Ließ Layphan Hans
lein von weinsperg vn̄ der Amptman von krayburg / seine
getreue Kät daheim/züge aus vber den vngehorsamen vn-
trewen wunger/oder brueder von Trier/der sein knecht/sein
sone/vnd aigne vermonger/zum dritten nit wolt hörn das er
gelt gebe. Darumb er auch vorhin/von der christlichē/das
ist yzt wüeterischen kirchen verclagt het/wolt in treiben inn

gemeinschaft der heiligen. Sing an zum ersten bruederliche
jue zu scherzen / das pöß gut / das desselben von Trier / armen
dardurch nit verdambt würden / vñ er der Franz ire sele got
besülhe / ließ in nit vile / damit sy ir hertz nit zu den scherzn / sun
der zu got setzn / Nam auch sand Wendl was er het / damit
er fürterhin kains sacks oder teshē vberfelt bedorfft. Er war
auch an das / alt vnd nün mer verdrossen / swer zertragen / al
les nach lere der heiligen Christenlichn / das ist wüeterischen
Ewangeli / vnd kam darnach für dy heilig stat Jerusalem /
das ist Trier / darinnen het er gern besehē / das klaid Jesu vñ
seckhl mäister wordē. Damit der .xxx. pfennig nit also pösslich
vnd dy salb Magdalene nit mer so vnnützlich ausgeben / vnd
verschüt / sonder dasselbig vnd dy armen / das sein dy kriegß
leüt ausgetait würde / dan es wer bald winter / vnd het ir kei
ner zwen rōck / doch vil mer dan zwey schwert. Vñ derselbn
gieng jme ein grosse schar vor / vñ ein grosse rot nach / Riten /
Auch vil dy schuern all. O stranck her stranck her filij Dias
boli / Wie solt ich sagen O sanna filij Dauid. Aber nyemant
aus Trier / streit seine klaid er od palm im weg / wolt jme auch
nyemant vber nacht behalten / wiewol er gern het vil gelernt
in jrm templ / in sollicher clarer lauter Ewangelscher hand
lung sein erwacht der Pfaltzgraff Landtgraf / schicktn bald
jre junger auff den hochzeitlichen tag gen Trier. Aber als
bald Franz mercken ward / das sy seins Ewangelschē gesetz
nit / sonder Seducirer warn / vnd nit hielt von Franzn auf
erstentnus vñ er woll wüßt aus Paulo / dz kain gemeinschaft
Belial vñnd gots ist / macht er sich wider auff gen Bethonia
idest Ernberg zu / vnd das volck jme nach wider ein grosse
schar / hetten gern denn zoll als ich hör / oder solt gehabt / so
het er kein gelt / so werd sand Peter nit entgegen / das er visch

vingen vñ in demselben den zoll gefunden. So war Judas
auch mit dem seckl gen marckt gangen/vnnd do kain zalung
verhanden/do gieng der her Franz von dem perg herabe
vnd lernet sy dy acht seligkeit. Als wie da selig werde/dy ar-
men dy trawrigen/dy verfolgten/vnd domit sy so sy yzt sein
junger wern derselbn seligkeit mit allain tailhaftig vnd man
dann den negsten soll lieben/als sich selbs/gebott her in / ein
new gebott das sy dy ihenen so vor ine guet abgeseherzt was
damit sy gar volkumen wurden/verprennen vnd nemen sol-
ten / alles das sy hetten / Wölchs so geschehen zog er haim.
Sölliche ewangelische Christliche handlung dy ich mein
khain Türck oder Tater Franz vnbl angelegt oder den Trie-
rischen volck vergönnet/kumbt nün dy vn Ewangelisch sy/
nagog vnd nymbt der Ewangelischen kirchen ire heüser vn
flecken/zwingt es auch annder daselb züthün/als gegen Jo-
hann hilchin im Kinckaw geschehen ist/das nit zü erparme-
ich wolt das vil mer noch erzeln/ so muez ich hinaus vor dz
wasser abschlagen. Puzer/ het es der schalck guet gemaint/
er het es nit vbl geredt. Aber warum sagest du nit sollich pos-
sen den junckhern des orts/dy sein auch ser gut Ewangelisch
dan hetn sy gewüß das der pöswicht solichs Franz zü vn-
guet oder spot geredt/sein gepain het in nit weiter getragen/
Wiewolich noch an dem nit vil gelegen ist. Schnap/ Pöz
macht/wen mit der pöswicht wider hinein komen ich wolt
ine selbst erschlagen haben/ aber er hat sich aufs dem stawb
gemacht. Ich war auch nün in einer zech bei vil Pfaffen di
hetn eingefeln stechen ob einem todtn paurn gehabt/des nam
ich mich nit ane das ich auch gut Ewangelisch wer / vnder
denselben was ein junger frysenlich leckher/ich wolt das ich
ine solt erstechen/der hüb an vn sagte/ Ja was treibt Franz

für Ewangeliſche ſtückh/er treibt woll Biebiſch poſwichts
ſtückh. Were er ewangeliſch/ſo wer er demütig. Aber er wer
gern ein Fürſt vber all fürſten / Item er ſol ſemffmütig ſein/
ſo verbert vnd verprent dy armen/Er ſol aufrichtig vnd ge
trew ſein/ſo helt er weder brieff noch Sigl/dañ wann er dy
armen lang prantscharzt/ſo verprent er ſie darnach darzü/ſo
ſolt er barmhertzig ſein/dieſelb ſein barmhertzigkeit kenne die
armen lewt Lottringiſchn Metzichen vnd Trieriſchn armē
pawrn ſer woll / Ja wer iſt durſt den er hat zū gerechtikeyt
in dem ſo er vermaint vil gelts zehabn/teſche ja vber kumbt
er ainen der ſy pringt/er ſchennckt im ſelbs tapffer ein / Vain
warlich Chriſtus hat in ſolhs nit gelernt im .v. vnd .vi. capi
tel Mathei. Es iſt wol 8 Turck bafer dañ Machamet ſelbſt
der Teufl hol in alls er lang würdig wer gewest leibhaſtig/
Dabey ſaſſs auch ein ander alter ſchalk der ſagt warlich her
it redent recht/er lebt mer teuflisch dañ Ewangeliſch/ dann
ſo er ſolt fridſam ſein/ſo macht er alle vffrüt vnd wo dy hav
loſen lecker ſein/d iſt güt mit hoſirn/huern/züſauffen/Kaiſ
dienen vnd got leſtern poſlich verthan haben. Welche ire vä
ter fromb/warhaſtig Edl gewest. groſſ ſtiffung vñ gepew
volbracht habn die ſolch lecker yrzt in weſen vñ pawe (Wie
wol yne groſſe guet verlaſſen) nit behalten mögen von wegē
lauter irer puebercy vñnd mütwillen / dy raiſen Franzen zū
vnd wellen Ewangeliſch ſein / heten es alles gern gemaine/
Damit ſy ire füllerey vnd püberey deſter paß möchten hin
auß pringen. Aber ich hoſ zū got der gerechtigkeit die frumē
Fürſtn den ſy abgeſagt haben ſollen inen das ernenndt recht
vber das Ewangeliſium machen/ vnd der Hencker den Text
zū dem galgen hinauß verſprechen. Schau an lieber Putz
Poz veltins willen/waß ſolt ich darzü ſagen/ich kunth vnd

torfft in kein widerparthey halten / ich gedacht in mir Sam
mer Porz macht / Es ist schier vnd also dy warheit. Putzer
Lieber laß dy Kfl schmecken vnd schenden / got hat auch ge
liden / sein wir dan ewangelisch so muessen wir dan auch lei
den / den der knecht ist nit mer dan sein herr / kunden wir vns
nit rechen lieber schnaphan / so sollen wir geduldig sein / dan
wir haben den trost / dz wir in geduld besitzn vnser sell / Aber
du soltest denselbē püßl knopffen mit so lang haben zugehort
das sy frantzen sein / Er also hietn abgeschnitten / sy möchtē
dich wider auf einen pösen weg gebrocht haben / Dieweil sy
kein geschriffte versteen. so schelten sy frantzns werck / warlich
glaub mir es were dir nützer gewesen / du werest dieweil auff
Kmitlinger staig / oder bey knoblings creutz / oder püßin paum
gewest / einem kauffman seins gelts minder gemacht / dan du
solche nachred gehört hast / die dich in pösen willen gebracht
haben / Aber wonlon es wil dünckelhn / wir wölln dahin ein
ziehen / do haben wir ein ewangelischen herrn / ja da wollen
wir bass von der sach reden / ich hoff es sol noch guet werde
Schnaphan / gots element diser herr furcht den Pfaltzgrafn
auch / dan er ist im angeben / in hat gereret das er sein schloß
hewer hat lassen deckhen / Er der Steyninger furcht er hab
es einem andern gedeckt / also geneist er auch des ewangelii.
Putz / Lieber kum ich sol in wider mit 8 geselschafft erkueckhn
das er nit trawrn soll / ob er schon vmb all sein guet kem / dan
das ist suesz joch Christi. Schnaphan / Ist es kumen / vmb
was einer hat / ein suesz joch / so ziech der Teufl an demselbn /
wen petln thüt wie / so gibt man wenig vergeben / wil es dan
einer selbst nemen / so wil jme ye dy zeit zükurtz werdenn / als
mir offte geschehen ist / das mir der grunde schier lies stunde /
Aber zeuch hin zum Steyninger hinein ich wil dir nach gen

sicht mā vns wol an/so sich ich es gern. Putz/Ane des Stey
ningers thür hoia hoia. Steyninger/ knecht schaw wer ist
daussen far schon/hastu geluck du kumbst noch wol herein.
Schnaphan Putzer/laß mich herfür/der knecht kent mich/
so durffen mir nit lang bescheid gebenn/Knecht. wer pistu
daussen/Losa stalbruder/ ich bin da vñ sunst ein güter ewan
gelischer herr/thue auff knecht. seit jr auch güet Lutherisch.
Schnaphan/Portz marter/was fragst du/ kensst du mich do
wol/wer den der pfaff nit guet Lutherisch/sand veltin züch
mit jm/Knecht/Lieber Schnap. ich treib mein schwenck/
ziecht einher/vnd seyt wilkumen. Putzer/ein gue: jar mein lie
ber schlücker/ist der herr in haim/Knecht,O ja Putz. so ko
men wir recht. Steyninger woher jr fromen woher. Putz.
tausent gueter jar gstrenger herr. Schnaphan/vil glücks ge
strennger herr. Steyninger/ wo her also zü süeß/wo sein die
mützen herr schnaphan. Schnaphan/Portz leidē ich weis nit
ich halt ich hab meinen jm Trierischem landt verdrunckhen
ich hab ye keinen mer. Berner/Portz veltin schwager Eysen
clat/wie ein veint gefindt kumbt da/ ich mein got hab vns zü
samen tragen. Berner/ es kumbt pfaff putzer der muess hin
da etwas ewangelisch lernen. Eysenclat/ was ist das für ein
putzer. Berner/ kensst du in nit/ frantzzen pfarrers zü Amstel
Ey lieber der selb lecker/der dy Nünnen auß dem kloster furt/
Eysenclat/wer den mein pfarrer auch hie. Er müst ein guet
stuckle von im lernen. Berner/wilkum putzer. wo her so spat
was lauffts du vmb. Putzer/gnad junckher. Schnaphan/
der lecker leigt junckher/er hat mit auß gesagt/er wol züm
Liechtenstern/vnd aber ein Nünnen haben/ wie nün zü Lo
benfelt/seinem junckhern gee noch eine ab. Putzer/Ey was
sagst du/ es ist nit meynung wie du sagst.

Berner. Por macht Putzer. Putz dy Künen/nün waidlich
dy Kocher möchten jnen sunst verschimelen/Waist du woldz
geschuben stett. Nert euch vnd erfult das erdrich. Putzer/
ja junckher ich spar mich nit/diser Text hat mir vor. xx. jarn
wol gefallen/da ich schon noch in der kütten steckt. Eysenclat
ho: pfaff ich mueß mit dir auf kuntschafft reden/lieber mag
stu den auch putzen. Putzer/ ja junckher / den tag vnd nacht
ungeuerlich zwelff mal. Darnach mir der harnisch gefellt /
den ich putzen soll. Eysenclat/Por veltin hab danck / verges
bens bistu nit als ich hör ann vrsach hüren haubtmann in
frantzen hör gewesen/dein sach stett wol. Steyninger/ wol
an jr schwäger es ist essens zeit hin züm tisch. Berner/ Eysen
clat sitzt auff hin/Putzer Schnaphan da herfur/vnd knecht
schenck tapffer ein/so wir gezechen/wirt dy sach leicht pesser
bring es einer dem andern. vnd seyt leicht synns. Berner wol
an Steyninger/Es gilt dir den gar auß vnd pitt fur den Pu
tzer/der mueß beschaid thun/vnd darnach etwas Ewange
lisch lernen/oder dy stiegen hinab. Putzer/junckher es darff
der not nit/was ir wolt. das wil ich auch. Steyninger/putz.
lieber gesell wie sicht dich dy sach ane mit frantzen vnd vn
serm bunde/es wil der pöß weg an / Herman von franberg
Johann hilchin. Thoman von Koserber vnd Erlinckiner
haben ein pöse raiß gethan / so sitzen vnser drey dy synn zü
Haydelwerg auch angeben/ haben vns nichts güts auf den
Sumer züuersehen/so hat nün frantz vnserm dem Pfalgraf
fen auch abgesagt/das ist das pößt flaisch/wolan wir sollen
wol sein genieffen/das wir vmb vnser pawrn vnd heüser ko
men/ Ich wolt gern Ewangelisch haltñ / ich furcht aber es
sey zü schwinde angefangen worden. Berner/ Ja bey Chri
stes leyden/ ich wais wol das ich kein gehör zü Haydelwerg

han/schreib ich dahin mir wirt spürzig geantwurt. Ich wolt
ich glaubet als mein vater seliger/vnd wer der new wein wi
der im vass. Eysenclat/es dunckt mich/samer sand Cüreins
leyden der Teufl sey im spil vnnnd hab dy schantz verpletert/
Ich bin selbst zu Haydelwerg gewesen. der himl ist trueb mā
siecht einen durch dy wolcken an/selt der regen in vnser zirek
es wirt zeriessne sach darauff/vnd solt sy sand Cüre flicken.

Schnaphan/Ja lieber junckher / das ist dy vrsach das ich
meine Nutzen ainē wagenman hab verkauft/will der heckn
den wintter muessig sten / einer wais schier nit wo er ist/ Ich
endtritt negst den Pfaltzgraffischen parorn kaum/dy stießen
auff mich bey Richerhausen im grüntlein/ heten sy mich er
wüsth/ich forcht ich leg auff alten haydelwerg/dan sy sa
gen man streck einem den glauben daselbst dreyer artickel len
ger dan er sunst ist. Knecht/ Ich bin vor gewesen in des pfarr
ers haus der ist von weglstat von einem todtn gefress kome
n vñ hat die abendteuflische brief pracht/ dy sol Franz an den
Teufl vmb hilff geschriben haben/dy haben als ich glaub
di pfaffen daselbst aneinander zügestossen/weil Franz auch
irs hern veindt ist/inen solt einer aller heiligen marter anlegē
Steyninger/lieber sage war. Knecht/es sol sein Sigler das
das pfefflein sitzt hinder dem offen/vnd gedenckt/fart schon
ir marter hansen/euch wirt der pfeffer noch paß gesalzen/ie
habt den selbst angefangē. Putzer/gestrenger her wo es euch
nit verdryßlich wer/wolt ich auch mein meynung zü disem
handl fürbringen. Steyninger/mach her lieber pfaff mach
her frölich. Putzer/gestrenger her vnd gunstig junckherrn/
mich wundert/vnd befrembt ser hoch von euch als den ver
stendigen gegrundten vnd vesten im glauben. Steyninger
O pöswicht putzer/wie kanstu so gar nit vedern lesen. Putz.

das er auch entsetzt von denn Fursten lanndung ir gen etlich
torn freündt/forchtendt euch nit dergleichen geschehen. Si
gler/Des were langst zeit gewesen/ vnd were mänger bider
man bey seinem guet beliben. Putzer/ ich mueß schier sagen
das euch solchs allain auß zweyflung im glauben zükamert/
vñ nit wunder das ir schmechlich verdurbt vñ vntter gang
darab erlidt. Sigler/es sol geschehen/ das geb gott bald ee
dy baum wider reisen. Putzer/ wist ir doch woll wie Petro
geschach do er auff dem Noß zu dem hern wandern wolt /
do er schier vndergangen was auß zweyflung/ darumb yee
der herr vnd sagt/du klein glaubiger warumb hastu gezwey
felt/also sag ich euch. Sigler/Pöswicht putzer wiewol kan
stu den schragen des versürens zu marck sezn. Putzer/ lieber
junccker seit keckh als ewr haubtman der frantz/der schier
aller Fursten veindt ist/vnd furcht nit euch züwern vñnd zü
leiden durch Christum. Paulus spricht/wer wil vns schaidē
von der lieb Christi/wed schwert/hunger/noch kümer noch
der todt/habt ir nün eür bundt in der lieb Christi vñnd des
negsten angefangen. Sigler/ja das sy Christum lesteretn vñ
dem negsten nemen was er het. Putzer/hey so furcht euch nit
von Christus vñnd des negstens wegen zü leiden/schmeche
schande verzagen/vñ pösers/dan Christus spricht/ selig sein
dy verfo'gung leiden von der gerechtigkeit wegen/ vñ wey
ter/es wirt kumen dy zeit dz ein yeglicher der euch todt/meint
er thue got ein dienst daran/ wann sy nit kennen meinen vater
noch mich/vñ sy wern euch aus der Synagog stossen/secht
lieben juncckhern diser Text ist schön war weil ir in der Teuf
lischen acht zü Nürnberg seit ausgetriben/ vnd ewr verfol
ger sein dy Furstenn warumb das ir dy gerechtigkeit wider
wart auff erdtrich bringen dy vohin lang gen himel gefarn
ist/wie kumen dy Furstn darzü. Eysen. sy kennen das ewan

gelium vñ sand Paulū nit/ haben auch nyemāt der sy es ler/ nen mag/ als mein junckher Franntz aus dem kennen sy auch Christū vñ sein vater nit/ glauben all ain dem Römischen Ein den Crist vñ seinen anhängkhn. Weil nūn dem also/ furcht ir euch/ dan/ wist ir nit der gerecht nit verlassen wirt/ vñ das. r. gerechter als gūt wern/ als ein thausent vngerechter. an dem pūch der Streiter. Sigler/ oder deiner hengt hn māssigen gerechtigkeit lieber putzer. Putzer. Ja es ist war wie ich gehn hab/ vñ ist es schon sach das ir verliern wert/ dennach furcht euch nit/ hat doch Petrus sein vischgarn/ Paulus ein wenig feld verlassen/ Christus selb gar nichts gehabt/ habē es doch alles besessen. Also liebν herin vñ junckhern seid getrost/ wie es get/ ewrs lons ist vil im himel/ get es euch schon hie vbel/ acht es sey gots wil/ der strecht dy seinen/ vñ verliert jr schon etwas hie durch seinē willē/ es wirt euch hundertfeltig wider in der ewigen seligkeit/ thāt als habt ir vorhin nichts/ so wert irs alles besitzen. Sigler/ O wie ein gūeten tisch peicht vater hetest du gebē/ du trost wol biß an galgen/ hiengst aber selbs nit gern/ du anmechtiger pōswicht. Eysen. Putz. du trost wol es gerat halt oder nit/ doch wie es wil/ slag sand veltins leidē zū/ wirt ich schon verderbt/ zeuch zūm frantzosen/ wildan d j narüg bey im auch nit fūrgang habn/ so thue ich als vor/ vñ hoff zū got/ er laß mir dester mer Vürmberger vñ Augspur ger kaufleut zūsten/ dz ich das mein wider/ nit allein dort sund auch hie hundertfeltig vberkome/ ich hab auch nit vil/ es ist vñ ein pōß pergheußlein zethūn/ hab ichs jar nit gar hundert gulde einfalle/ vñ woz ich sūnst vō meinē parorn scherz. Berner aber ich verlar nit gern woz ich han/ es wer mir zeuil so kan ich sonderlich auch nit mit den kaufleutē vñ gen/ ich schemt mich auch sein wo mā es vō mir saget/ dan ich erst bey frantzūn recht lern raifz dienen/ wil es ye vbl aus/ so wil auch gelt geben/

Ich hoff man nem es gern alles von mir an als einē andern/
da mit ich wider bleib. Steynin/Porz macht/ ich hab schon
ymb vertrage vnd gelt zū geben geschrieben/bin auch schon
verwont/durch einen heimlichen guetn freundt/es hab kein
not man wer gelt von mir nemen/steyninger wolgeredt dur
ch einen heimlichen guetn freundt. O frumer Pfaltzgraff al
so get es/traw k̄ainem du kennst ine dan wol / die geselln las
sen aneinander nit/dan es frist k̄ain wolff den andern. Purz/
also fr̄ölich hindurch/got wirt es mit euch haben/seyt keckh
last euch nit erschrecken Ir erbern p̄urg/Landstal/Drochen
fels/Bairn vnd Kaltenfels aufgen/es fleust dyweil vil was
fers den Rhein hinab/wert ūch streubt ūch / dann Christus
wist ir wol hielt selbs nit das er gelernet / schlecht dich einer
an den packen reck im den andern auch dar/sonder do er ge
slagen was vor Annas/redt er dem släger zū. sprach warum
schlestu mich/darauf er vns zewern/vnd nit gar vnttertrus
cken gelernet hat/get es euch dann gar hinter sich/so thuet als
dy Apostel / dy giengen frolich auß den Synagogen wan sy
geschlagen worden/vn̄ freūthen sich das sy wurdig wern zū
schmehen vmb Christus willen zeleidenn/also thuet auch ir
Christus wirt euch nit verlassen/get er von euch er wirt schon
wider zū euch kumen vnd nit verlassen als dy waissen/wie ir
selbs zūe gesagt habt. Sigler/ ich hoff er wert nit lang auß
sein/der Pfaltzgraff wirt ein haubtman werden / das ir ges
suecht werdet als ir wol verdient habt / dz ir souil Noit vn̄
prants gestiffit habt in Trierischen landen/an altn vn̄ jungen
des sich got von himel ließ erparmen. Eysenclat/Porz macht
will man vns darumb fressen / das wir schon ein vberzogen
haben/sein es doch nichts dan reutters mer / so ist es alles dz
wir gethan haben allain der gerechtigkeit zeguet geschehen/

wir muessen velleicht hinwider p̄iessen. Sigler / O thues
thues der gerechtigkeit zeguet / du werdest mit deiner gerecht
keit langst / kopsens vnd Rederns vnd verp̄rennens wert ges
wessen / got laß dir dein gerechtigkeit er deyhen. Steyninger
onzweyßl wirt hinwider gepiessen werden / dan ir vill haben
schon dyzen gepleckt. Sigler / es ist verdo:bens gesind / es
wirdt bald ein end mit inē / Her got ist kain bair / der Hencker
hat schon dy klingen gewerzt / vil muessen darüber Steynin
ger / Porz leiden / Ir sagt vil von der gerechtigkeit vñ hin vñ
wider peissen / nichts weniger send ir vil schon vmb dy heu
ser vnd vmb ir guet komen / es hilfft doch kein recht vnd er
pieten mer / heut schickt man einem dy vier warnung / morgē
ist man im kurtz vor dem haus / Sand Cürens plag / ich bin
der Keiterei schier veindt worden / mir schwindelt als darhin
den. Sigler / Ky sollichs alles ist ein newe Frantzische Con
stitution dy habē des genueg / wer der knecht wider do / so he
ten wir velleicht anders / Knecht / ich bin hie vñ bring dy brief
vom pfarrer. Steyninger / so hin schwager Berner du pist
der geschickest vnder vnns lies was ist es. Berner / schufft
frantzen von Sickingn An den Teufl in der helle.

Volgt hernach der brieff an den Teufl.

Dem hocherschafft̄n Grosmechtigen fursten vnd herrn her
ren Lucifer / König der hellen furst der mittlen vnser region
des lufftis vnd der gais̄t dy darinnen sein / meinem genedigsten
herrn / Hochgeschaffner Grosmechtiger König / furst vñ herr
K. kay. may. sind mein vndertemig geflissen willig dienst alle
zeit / Grosmechtiger herr. K. kay. may. ist vngeweyfelt güt
C

wissen wie ich vergangenerzeit ein löblich bundt zu lanndaw/
angefangen zu trost der gerechtigkeit dy ich wais groß statt
an barmhertzigkeit in. E. Key. may. gebieten/haben wir des
selben bunds frome vertronen/einem vnchristlichen pfaf/
fen vberzogen/denselben von wegen seiner vnmitigkeit/das
er nit gelt wolt geben zestrassen/durch weches ewr. Key. may.
reich als mengtlich wais hochgemert worden vn noch wer
den soll/Aber dy hinderes derselben gerechtigkeit vn meines
gütn furnemens haben mir sollichs fürkomen begern auch
mich vnd des bundts vertron züvertreiben/als sy dan mey
nem Ammā von krannburg vnd ander mer. E. K. may. Em
sig diener beschedigt haben/sollichs hab ich auch dem hime
lischen kayser clagweis wöllen fürtragen/ vnd bitten mich
als seinen trewen haubtman des neuen Reiterischen Ewan/
gelj bey recht zübehalten/Aber mein potschafft ist mir durch
seinen hinckeden Petrum verhindert vn nit für gelassen wor
den/derselb hat auch mich mit worttn als dan angetastt/vn
sagt ich sey ein rauber/Mörder/Prenner vnd glaubbrüchi/
ger pöswicht/hab vil mordts vnd vngluch in Trierischen
landen gestiftt/dan man vil kleiner kinder fundē dy das gras
frassen/als das viech/etlich vor hunger todt/etlich noch an
püßten der todtn müeter saugende/welches ich dan yzt sein
las/verhoffens denselbn hincketen schalck zu seiner zeit auch
darumb haim züfüechē/das ich wais mir allain von jme ge
schehen/Darum das ich etwan Diether von hentschüschn
zügeschrieben/er sol kainen heiligen mer (als sich der hincket
Petrus schelten last) bitten/vn ir bild aus der kirchen tragen/
vnd sunst da er der alt schalck nye sey gen Rom kumen/vnd
sein vicari daselbs/der war anterchrist sey/Darumb dy weil
nun ich vor dem obristen kayser nit hab mögen fürkumē/wie

wol ich sein nit sonderlich acht/ursach/das seiner.mai.reich
weit von mir gelegen vnd dan. E. Key. mai. das ander haubt
der welt nach ime/bin ich verursacht dieselbn. E. Kay. may.
vmb beschützung mein vnd der meinen an zerüffen/von wel
chs wegen/vñ das Ewr Kayser. maie. gnad dester ehe möcht
erwerben/ gib ich mich züvorderselben Ewr Keyserlichen
amiestat sambt ganz meine bundt/vnd bundts verwontē al/
len helffern. vnd helffern helffern/ vnuerschaidenlich in der
pefften form vnd gestalt/wie dan das beschehen sol vnd kref
tig ist zü leib vñ sel aigen/Vnd bitt darauff. Ewr Keyserlich
maiestat vntterdenigklich / mich vnd die meinen gnediglich
anzenemen/vnd für derselben leib vnd sele aigen zü beschutzen
vnd schirmen/vnd wo für mich gezogen/als mir nit zweifelt
rettung zü thun / das wil ich mich sollichn ergeben/ vnd der
billichkeit nach zü Ewr Keyserlich maiestat/als gnaden anme/
mer aller dy ir hilff begern genzlich vertrosten / vnd mit leib
güt/vnnd sambt allen meinen verwonten vntterdenigklich
verdienen/ Geben vnder meinem zingieß zü Lanstal Am.
zehend tag Nouembris/Anno zc. xxxij.

E. K. M.

vndertheniger Franz von Sicking
Bern kñig am Rhein vnnd hert
zog zü Francken

Wider schrifft des Teufels
an Franzen von Sicking

C ij

Dem weitbekantthen vnnsern lieben getrewen Franzen von
Sickingen gern könig am Rhein vñ hertzogen zu Francken.

Vnnsern grües gnad vnd günst/züuor Weitbekantther lieber
getrewer/ Dein geschriff begert / vnd bitt haben wir vernom-
men/wann aber du dich vnd dy deinen vns züuor veraigest/
wildt verlassen dein dienst des oberisten himelischen kaysers/
der dir zü weit hilff zethün gelegen / vnd wir negstes regimēt
der welt nach ime haben/Wiewol wir auch nit gern mit ime
vnd seinen verwontn zeschaffen haben/dañ er vber vns eins
wunderlichen selzamen gemüets ist / vnd dañ vnns wol wis-
sendt/das du vnnsere Reich nit wenig gemert hast / vnd ver-
sehen vnns getrewe dienst vnd merers nütz von dir / vnd du
danñ dich vberzügs besorgst / soltest vnd magst du dich gantz
lich zü vnns verlassen/das wir dich mit sichparlichen vñ
vnnsichparlichen vnnsern emb sign dienern/wollen auff deiner
widerparthei Costn vñ schaden zerettē nit vnderlassen / dañ
ye mer du ime laides vñ schadens züwendest / ye mer du dich
zü vnser günst tñest neygen / wir wollen dich auch aller dei-
ner werckh dy du in solichen übest nit vnbelont lasen/das ha-
stu dich zü vnnsern gnaden gantzlich züuersehen / Wann wir
ab dir vñnd den deinen lanng ein groß wolgefallen gehabt/
wollen wir dir außs sonderlichen gnaden vñnd günst nit ver-
halten. Geben in vnser wonung apud Stigiam paludez
an. xvij. tag Nouembris Anno rc. vnnsers hellischen Regi-
ments in Tertio/

Steyninger/Porz veltin/ir schwäger/wie gefallen euch di-
se mer / sol Franz des Teufels diener sein. Berner/Porz krafft
es ist erlogen/ Franz hat es mit gethan/es ist etwe über ine er-
dacht worden. Sigler/ob es schon erdicht wäre/besecht es
ir recht/es ist der warheit nit vneben/schadet euch nit ob mā
euch vil pösers erdicht/dañ ir habt es auch lanng getriben .
Eysenclat/Sammer porz macht/wüst ich ein lecker/der ein
solhs vber Franzten erdecht/ ich wolt ein schwertz schaiden
ausz ime machen/vñ solt ich ime noch .x. jar porzen. Schnap-
han/Porz element es ist ein pöß stück/doch frag ich nit vil dar-
nach/würt nit mer dan vff vnser seint geholffen das sy oble-
ge/sannd Stolprians leiden schläge darzü/vnns hülff der
Teufl od sein müter. Putz/nit also schnap . Seien wir ewā
gelisch nachfolger Christi/ so sollen wir nichts mit dem teufl
zeshicken haben. Sigler/ Ja wol geredt/ist Rauberey/Pren-
nen/Mordt stifft/den armen das ir nemen/Christum nach-
folged/Nümen ausz den klosteren/kein gelübd halten
wol gethan/so würt der Teufl nit mit euch zeshaffen haben
Ich versich mich aber genzlich / er hab euch langst ir erlös-
sen püben ewr tail himelreichs zü aigen abgekauft vñ schon
bezalt. Knecht/bei got herr der pfarrer sagt es seien nit Tant-
mer es sey war/das der Franz dem Teufl geschriben hab /
Er woll es bisz sonntag offentlich auff der Canzel predigen.
Steyninger /got geb dem pfaffen sant Anthonis leiden/ Er
hat es von seinen schalcks pfaffen richten ine mir zetratz also
ab/ ich töiffst ine porz jamer wol von der pfrundt geheyen vñ
durch platten lassen schlagen. Sigler/ peyß im ein creutz in
arsch/so schleufft im der Teufl nit hinein. Eysenclat/Porz ley-
den ich habz meinem lecker auch gethan/Nür mit den püben
dem wasser zue/wollen sy nit guet Lutherisch sein. Berner/

Samer por macht/toipffst ich sy woll all zum Teufl jagen/
ich hab der dieb wol. xvj. in meinem gebieth/ vnd dy pfrun/
den Kaisigen knechten geben/dy beschirmen doch das land
vnd machten arm leüt/wie dan jr art ist Knecht / Junckher
ich wolt das ir meinem herrn ains darauff brecht / das er es
auch thet/dy schelmen ver jagte / vnd dy pfründten den kne.
chten gebe/so wyre mir velleicht auch aine. Sigler/ein dreß
auff das maul/du wainest gern so hast du ein weil zesaugen.
Puzer/lieber junckher. xvj. pfaffen zehaben ist to:hart / ainer
wer gentig/Nür mit in an galgen/sy thuen nichts dan das sy
dy leut vmbß gelt bescheyssen. Eysenclat/danneck hab Nür
nich das du dy warheit sagst / du muest bey gots macht mein
pfarrer werden / ich vermag es an frantzen/es grit dir ein gütz
darauff. Puzer/got gesegen dir ine ich warts gern. Sigler/
der Teufl gesegen ime auch/O Puzer Christus/vnd Pau
lus haben dich mit züesauffen gelernt. Steyninger / das hort
ich gern/saufft das irs speit/es ist pesser/durch vns gethan/
dan vnser veindt. Puzer/brings dem schnaphan/als mir zü
mit freyden/

Güets mutets zü disem zill/driüz der vns were/

Zü Olm sein der käusleut vil/dy muessen vns all ernern

Puzer Amen

Sigler

Zü Nürnberg stett ein Galgen hoch / do wart der Hencker
erw noch/jr werdet ime werden eben/Sing auch Amen.

O du amechtiger dieb Puzer/dan mein text ist des Schnap
han aufs der melodia/

Beschluß

Also hastu mein lieber leser das gemein leben/werck vñ Con-
uersation dy meins bedunckens nit wenig von allem vbl/als
posser vorschziger Rauberei / Mordt/Züsauffen / Gots leste-
rung vnd Teuflisch nachfolgung gespeist vnd faist gemacht
ist/der Neien Keiterischen ewangelische id est/ Lesteter Cri-
stum/welchs in jrn wercken vnd volkumentheiten/gleichen
den Jungern Pauli/dy er dem Sathan gab/ derselbig wie-
det jne an zweyfl den lon vnd kron jrs schweyß vñnd flaisch
völligklich zegeben vnuerdrossen vnd willig sein/Aber wil-
tu selig werden/verlaß das Ewangelium vnd Paulum gar
nit von jrn wegen/Sunder lere sie vnd volg demnach/wir-
dest on zweyfl dem himelischen preitgam zu was zeit du ku-
men/mit aufgethaner thür entgegen haben.

Faint, illegible text, possibly bleed-through from the reverse side of the page.

